

ጳውሎሲ ታሶሎንቄ አሳሰ ጳፊዳ ናምኣንሉ ኪታ ጊዶ ቆፋ

ኪርሰቶሲ ናምኣንሉ ያናይሳ ጊሻሰ ኦይሻይኔ ኦሺ ዳንዲዳ ጊሻሰ ታሶሎንቄ ዋሳ ኬፋ ጋርሳን ሜቶይ ዳሪ ዳሪ ቢደሰ። ጳውሎሲ ታሶሎንቄ አሳሰ ጳፊዳ ናምኣንሉ ኪታይ፥ «ጎዳ ዩሳ ጋላሲ ማቲደሰ» ጊዛ አማኖ ቃላ ቆንጨሲ ዮቲደሰ። ጳውሎሲ ጳፊሼ ኪርሰቶሲ ያናፔ ካሴቲዲ፥ «ማካላ አሰ» ጌቲቲዛደይ ኪርሰቶሳራ ኤቄቲዛደይ ባሌሉን ሃይሳ አላሚዛ ቦላ ኢታቲሉኔ ማካላይ ዳሪ ዳሪ ባና ጉሳን ኢሰታ አማኖ ጊጊሳናሰ ዳፊቲሰ።

ናባቢዛይቲ ዋዬይኔ ሜቶይ ኢሰታ ቦላ ዳሪኮካ ኢሰቲ ባ አማኖን ሚኒ ኤቃና ማላ ጳውሎሲኔ ሃራቲ ኢዛራ ኢሲፊ ኦሊዛይቲ ኦሊዛ ማላ ኢሰቲካ ባ ዲሳሰ ኮሺዛይሳ ዴማናሰ ሚኒ ኦፋና ማላኔ ሎኦ ኦሶ ኦፋናሰ ኣዛሎንታ ማላ ኢሰታ ሎኤሊ ዘሬሰ።

ሃ ማጸፋይ ኦይኪዳ ኩሜሳ ቆፋ

ጌሎሶ 1:1-2

ጋላታኔ ሃዳራ ኢሞ 1:3-12

ኪርሰቶሳ ናምኣንሉ ዩሳ ጊሻሰ ኢሜቲዳ ቲሚርቲ 2:1-17

አማኖን ዲሳ ጊሻሰ ኢሜቲዳ ዞሬ 3:1-15

ኩሻ ቆፋ 3:16-18

¹ ጳውሎሳፔ፥ ሲልዋኖሳፔ፥ ጸሞቶሳፔ፤ ኦ አዋ ጸሳኒኔ ጎዳ ዬሱሰ ኪርሰቶሳን ጊዲዳ ታሶሎንቄን ኣማኒዛ አሳሰ፥

² ጸሳ አዋፔኔ ጎዳ ዬሱሰ ኪርሰቶሳፔ ኪያቲሉኔ ሳሮቲሉ ኢንቲሰ ጊዶ።

ጋላታኔ ዋሳ

³ ታ ኢሻቶ! ኢንቲ አማኖይ ዋዴፔ ዋዴን ዲጨ ዲጨ ቢዛ ጊሻሲኔ ኢንቲ ሲቆይካ ካሴፔ ጉጃቲ ጉጃቲ ቢዛ ጊሻሰ ኦ ኢንቲ ጊሻሰ ጸሳ ሎኤሊ ጋላታናሰ ቤሴሰ።

4 ሄሳ ጊሻሰ አንቴ ቦላ ጋኪዳ ጎዴቴላኒኔ ሜቶ ኡባን አንቴ ሚኒዳ ጊሻሰ ኑኒ ኑ ባጋራ አንቴ ዳንዳያ ጊሻሰኔ አንቴ አማኖ ጊሻሰ አማኒዛ አሳ ኡባ አቻን ጨቁቶሰ።

5 ሄሲ ዉሪካ ጸሳ ፒርዳይ ሱሬ ጊዲዳይሳ ቤሴስ፤ ሄሳ ጋሶን ዋዬ ቤኢዛ አንቴ ጸሳ ካዎቴላሰ ቤሲዛይታ ጊዲ ቤቴዴታ።

6 ጸሲ ደሎ ጊዲዳ ጊሻሰ አንቴና ዋዬሲዛይታ ኢዚ ዋዬሳና።

7 ዋዬ ኤኪዳ አንቴሲኔ ኑሰ ሼዎፖ ኢማና፤ ሄሲካ ጎዳ ዬሱሰ ኪርሰቶሲ ዋልቃማ ሳሎ ጸሳ ኪታንቻታራ ሳሎ ቦላ ቆንጨዛ ዋዴ ሃናና።

8 ሄ ዋዴ ጸሰ ኤሮንታ አሳታኔ ጎዳ ዬሱሰ ኪርሰቶሳ ሚሺራቾ ቃላሰ አዛዜቶንታ አሳታ ቦላ ኢዚ ባ ሃሎ ኬሳና።

9 ኢሰቴካ ጎዳ ሲንላፌኔ ኢዛ ቦንቾ ዋልቃ አቻፌ ኪቺዲ ሜርናሰ ጳዮን ቃጸዬታና።

10 ኢሰቴ ቃጸዬታናይ ኢዚ ጌሻታ አቻን ቦንቹታናሲኔ አማኒዛይቲ ዉሪ ኢዛን ማላሌታና ማላ ኢዚ ዪዛ ጋላሳን ሃናና፤ አንቴካ ሄ አማኒዛ አሳራ ዳና፤ ጋሶይካ ኑ አንቴሰ ማርካቴዳይሳ አንቴ አማኒዳ ጊሻሳ።

11 ኑ ሄሳ ቆፒሼ ኑ ጸሲ አንቴና ባ ጾይሳሰ ጊዲዛይታ ሂሰቴ ቆዳና ማላ አንቴ ሎኦ ኦላናሰ አሞቲዛ አሞዛኔ አማኖን አንቴ ኦሊዳ ኦሶዛ ኡባ ኢዚ አንቴሰ ባ ዋልቃን ፖላና ማላ ኑ አንቴሰ ኡባ ዋዴ ዋሶስ።

12 ቃሴካ ኑ ጎዳ ጸሳኔ ኑ ጎዳ ዬሱሰ ኪርሰቶሳ ኪያቴላ ማላ ዬሱሰ ኪርሰቶሳ ሱንፊ አንቴ አቻን ቦንቹታና ማላኔ አንቴካ ኢዛን ቦንቹታና ማላ ኑ አንቴሰ ዋሶስ።

2

ማካላ አሰ

1 ታ ኢሻቶ! ጎዳ ዬሱሰ ኪርሰቶሳ ዩሳ ጊሻሲኔ ኑ ኢዛኮ ባና ቡሳ ጊሻሰ ኑ አንቴና ቆፊሶስ።

2 አያናይ ቆንጨሲዴሰ ዋይኮ ቃላይ ጌሰ ጊዲ ዋይኮ ኑፔ አንቴሰ ከቴቲዳ ኪታ ማላ፡ «ጎዳ ዩሳ ጋላሲ ጋኪዴሰ» ጊዲ አንቴ ቆፋን ያርክ ያርኮፍቴኔ ዳጋሞፍቴ።

3 ኦኒካ አይ ሃኖንካ አንቴና ባሌሶፎ። ዳሮ አሳይ አማኖ ካዳናፔ ሲንፊ ጳያናሰ ቤሲዛ ኢሲ ማካላ አሲ ቆንጮንታ ዲሺን ሄ ጋላሳይ ጋኬና።

4 ኢዚካ ጸሰ ጌቴቲ ጎይነቲዛ ኤቃ ጸሳታ ኡባፌ ቦላራ ባና ጶቁ ጶቁ ሂሰቲዛዴኔ ጸሳራ ኤቁቲዛዴ፤ ኢዚካ ጸሳ ኬፋን ኡቲዲ ባና፥ «ታኒ ጸሳ» ጊዲ ኣዋጃ ኣዋጂሳና።

5 ታ ኢንቴናራ ዲዛ ዋዴ ሃይታ ሃ ዮኦታ ኢንቴሰ ታ ዮቲዲይሲ ኢንቴሰ ቆፌቲዜሻ?

6 ኢዚ ባ ዋዴን ቆንጫና ጋካናሰ ሃኢ ኢዚ ቆንጮንታ ማላ ኣዚ ዲጊዛኮ ኢንቴ ኤፊታ።

7 ማካላንቻ ጹራይ ሃራይ ኣቶሺን ሃኢካ ኦሶ ቦላ ዴሰ፤ ጊዶ ኣቲን ሃይሲ ሃናናይ ኢዚ ሃኢ ኦሶንታ ማላ ኢዛ ዲጊዛዴይ ኢዛ ኦጌፔ ኪቻና ጋካናሰ ጸላ።

8 ሄሳፌካ ካሊዲ ጎዳ ዬሱሲ ባ ዶና ፔናኒኔ ባ ቦንቾ ዩሳን ጳይሳና፤ ማካላንቻይ ቆንጫና።

9 ሄ ማካላንቻ ዩሲ ጸላኤ ዋልቃን ሄሲካ ኣሰ ባሌሉዛ ማላታታኒኔ ማላሊሲዛ ሚሻታን ሃናና።

10 ሄሳሶካ ኤኪ ኣቶንታ ማላ ቱማ ኢዲዲ ጳይዛ ኣሳታ ባሌፋናሰ ዲማ ዲማ ኢታ ኦሶይ ያና።

11 ሄሳ ጋሶን ኢሰቲ ዋርዶ ዮኦ ኣማናና ማላ ጸሲ ኢሰታ ቦላ ባላ ኦሶ ኪታና።

12 ሄሲ ሃናናይ ቱማ ኣማኖንታ ኢዲዲ ዋርዶ ዮኦን ኤፋዬቲዛይቲ ዉሪ ፒርዴታናሳ።

ሚኒ ኤቂቲ

13 ጎዳን ዶሴቲዳ ታ ኢሻቶ! ኦ ጊዲኮ ኡባ ዋዴ ኢንቴ ጊሻሰ ጸሰ ጋላታናሰ ኦሰ ቤሴሰ፤ ጋሶይካ ጸሲ ኢንቴና ኮይሮፔ ኦይኪዲ ኢንቴ ጸሎ ኣያናን ዲማቲዲይታኔ ቱሙ ኣማኒዲ ኢንቴ ኣታና ማላ ኢንቴና ዶሪዴሰ።

14 ኦ ጎዳ ዬሱሰ ኪርሰቶሲ ቦንቾ ጊሼቲዛይታ ኢንቴ ጊዳና ማላ ኦ ዮቲዳ ሚሺራቾ ቃላ ባጋራ ኢንቴና ጸይጊዴሰ።

15 ሄሳ ጊሻሰ ታ ኢሻቶ! ኢንቴ ሚኒ ኤቂቲ፤ ኦኒ ኦ ዶናን ጊዲን ዋይኮ ኪታን ዋይኮ ኦ ኢንቴሰ ኣሉ ዬዲዳ ቲሚርቲዛ ሎኤሉ ኦይኪቲ።

16 ኢዚ ኦ ጎዳ ዬሱሰ ኪርሰቶሲ ቃሴ ኦና ሰቂዳይኔ ባ ኪያቲፋን ሜርና ሚንፊሶኔ ሎኦ ሂዶታ ኢዚ ኦሰ ኢሚዳ ኦ ኣዋ ጸሳይ፥

17 ኢዚ ኢንቴ ዋዚና ሎኦ ኦሶኒኔ ቃላን ሚንሶ።

3

ዋሳ ጊሻሰ ሸቂዳ ኦይሾ

¹ ወርሴላን ታ አሻቶ! ቃሴካ ጎዳ ቃላይ አንቱ አቻን ሃናይሳላካ ኤሌሊ ኡባሶ ጋካና ማላኔ ቦንቼታና ማላ ኑስ ዋሲቱ።

² ቃሴካ አሲ ወሪ አማኒዛይሳ ጊደንታ ጊሻሰ ማካላንቻታፔኔ ኢታ አሳታፔ ኑ አታና ማላ ኑስ ዋሲቱ።

³ ጎዳይ ጊዲኮ አማኔቲዳይሳ፤ ኢዚካ አንቱና ሚንፋና፤ ጸላኤፔካ አንቱና ናጋና።

⁴ ኑ አንቱና አዛዚዳይሳ አንቱ ሃኢ ኦሊዴታ ሺን ሲንፋፊካ አንቱ አፋናይሳ ኑኒ ጎዳን አማኔቶሰ።

⁵ ጎዳይ አንቱ ዋዚና ጸሳ ሲቆኮኔ ኪርሰቶሳ ዳንዳያኮ ካሌ።

ኦሶ ኦፋና ማላ አማኔዳ ዞሬ

⁶ ታ አሻቶ! ኦሶ ኦፋንታ አሳፔኔ አንቱ ኑፔ ኤኪዳ ቲሚርቲዛ ማላ ደንታ አማኒዛይታፔ አንቱ ሃካና ማላ ጎዳ ዬሱሰ ኪርሰቶሳ ሱንፋን አንቱና ኑ አዛዘሰ።

⁷ አንቱ ኑ ለሚሶ ዋሰቲ ካላናኮ አንቱ አንቱ ባጋራ ኤሬታ፤ ኑ አንቱናራ ዲዛ ዋዴ ኦሶ ኦፋንታ ሮ ዴኢቤኮ።

⁸ ቃሴካ ኦና ሶፔካ ካል ሮ ሚላ ሚቤኮ፤ ቃሴ አንቱፊ ኦናሰካ ኑ ቶሆ ጊደንታ ማላ ቃማኔ ጋላሰ ዳቡራን ኦሊ ሚደሰ።

⁹ ኑ ሄሳ ኦሊዳይ አንቱ ኑና ካላና ማላ አንቱሰ ሎኑ ለሚሶ ጊዳና ጊዲፔ አቲን ኑሰ ኮሺዛይሳ አንቱፊ ኤካናይሳ ኑና ዲጊዛ ዋጋይ ዲን ጊዴና።

¹⁰ ኑ አንቱናራ ዲዛ ዋዴ፥ «ኦሶ ኦፋናሰ ደሶንታ አሲ ካል ዋፖ» ጊዛ አዛዘ አንቱሰ አሚደሰ።

¹¹ አንቱ ጊደን ኢሲ ኢሲ አሳቲ ኦሶ ኦፋንታይሳ ኑ ሲዱደሰ፤ ሄይታንቲ ኦሶ ኦፋንታ ሚላ አሳ ሮኦን ጌሊዛ አሳታ።

¹² ሄይታ ማላ አሳቲ ባ ኦሶ ሮኦ ጊ ኦፋና ማላኔ ባ ካል ማና ማላ ጎዳ ዬሱሰ ኪርሰቶሳ ሱንፋን ኑ ኢሰታ አዛዘሲኔ ዘርሰ።

¹³ አንቱ ጊዲኮ ታ አሻቶ! ሎኑ ኦሶ ኦፋናፔ ሙሊካ አዛሎፍቱ።

¹⁴ ሃይሳ ኑ ኪቲዳ ቃላሰ አዛዜቶንታይ ኦኒካ ዲኮ ሄሳ ሚሳቲዛዴ ሎኤሊ ካሊቱኔ ኢዚ ባ ኦሶን ዬላታና ማላ ኢዛራ ጋሳፍቱ።

¹⁵ ጊደ አቲን ኢዛ አንቱ አሻ ማላ ሃንቂቲ አቲን ዋርኬ ማላ ጸሎፍቱ።

ወርሴላ ሳርካ

16 ሳሮቴላ ጎዳይ ኢዚ ባ ባጋራ ዮኦ ኡባን ኢንቴስ ሳሮቴላ ኢሞ፤ ጎዳይ ኢንቴናራ ኡባራ ጊደ።

17 ሃይሳ ሳሮካ ታኒ ታ ኩሼራ ኢንቴስ ጳፊዳይ ታና ጳጤሎሳ። ታ ኪታስ ዱማ ማላታይ ሃይሳ፤ ኢዚካ ሃይሳ ታኒ ታ ኩሼን ጳፊይሳ።

18 ኦ ጎዳ ዬሱስ ኪርስቶሳ ኣጵ ኪያቴላ ኢንቴናራ ኡባራ ጊደ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b